



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 025987 17 Iž**  
**Sarajevo, 07.08.2017. godine**

Sud Bosne i Hercegovine u Sarajevu, u apelacionom upravnom vijeću, sastavljenom od sudija Zvezdane Antonović, kao predsjednika vijeća, Mirsade Džindo i dr Branka Moraita, kao članova vijeća, u pravnoj stvari izricanja novčane kazne i mjere zabrane angažovanja za rad na biračkom mjestu, odnosno u organima nadležnim za provedbu izbora, žalitelja Mušić Emina iz Bosanske Krupe, Mahmić Selo broj 39, protiv odluke Centralne izborne komisije Bosne i Hercegovine, broj: 05-1-07-5-142/17 od 27.07.2017. godine, na nejavnoj sjednici održanoj dana 07.08.2017. godine donio je ovo:

**R J E Š E N J E**

**Žalba se odbija**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, žalioцу Mušić Eminu je izrečena novčana kazna u iznosu od 400,00 KM i zabrana angažovanja za rad na biračkom mjestu, odnosno u organima nadležnim za provođenje izbora na period od 4 (četiri) godine, računajući od dana pravosnažnosti osporavane odluke, iz razloga što je Centralna izborna komisija Bosne i Hercegovine utvrdila da je žalitelja, kao predsjednika biračkog odbora na biračkom mjestu broj 004A014A u Osnovnoj izbornoj jedinici Bosanska Krupa, na dan održavanja Lokalnih izbora 2016. godine, odgovoran što je u obrascu za zbirne rezultate (većinski glas) za Općinsko Vijeće Bosanska Krupa pogrešno evidentirao glasove za pojedine političke subjekte i kandidate političkog subjekta SDA – Stranka demokratske akcije suprotno članu 5.25. stav (1) tačka 2) i 3) Izbornog zakona BiH.

Protiv ove odluke žalitelj je blagovremeno uložio žalbu u kojoj navodi da mu je žao zbog nastalih greška, jer je sve radio u želji da izborni materijal i rezultate evidentira na vrijeme i uredno, te žalbu ulaže u cilju smanjenja novčane kazne zbog svog materijalnog i radno pravnog statusa. Predlaže da Sud ukine ožalbenu odluku CIK BiH.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući ožalbenu odluku u okviru žalbenih navoda vijeće je zaključilo da je žalba neosnovana.

Imajući u vidu relevantne propise i to odredbe člana 5.25 Izbornog zakona BiH („Službeni glasnik BiH“ broj 23/01 do 31/16), Sud je utvrdio da je odluka CIK-e BiH pravilna i zakonita.

Odredbom člana 5.25 Izbornog zakona BiH je propisano da nakon zatvaranja biračkog mjesta i završetka postupka brojanja, birački odbor u odgovarajuće obrazce unosi sljedeće podatke: ukupan broj glasova, ukupan broj važećih glasova za svaku političku stranku, koaliciju, listu nezavisnih kandidata i nezavisnog kandidata, ukupan broj glasova za svakog pojedinačnog kandidata na kandidatskoj listi, ukupan broj nevažećih glasačkih listića, posebno navodeći broj glasačkih listića koji su nevažeći jer nisu ispunjeni, a posebno broj glasačkih listića koji su nevažeći jer su pogrešno ispunjeni; ukupan broj upropaštenih glasačkih listića; ukupan broj nepotvrđenih glasačkih listića koji se nalaze u glasačkoj kutiji, ako ih ima i ukupan broj neiskorištenih glasačkih listića. Zapisnik o radu biračkog odbora i odgovarajuće obrasce potpisuju svi članovi biračkog odbora. Ako neki član odbije da se potpiše, predsjednik ili jedan od članova koji se potpisuju to će evidentirati zajedno sa razlozima nepotpisivanja. Opisanim postupanjem žalitelj je počinio prekršaj odredbe člana 5.25 stav (1) tačka 2) Izbornog zakona BiH, pa mu je pravilnom primjenom materijalnog prava odredbe člana 6.7 stav (1) tačke 1) i 4) Izbornog zakona BiH i primjenom odredbe člana 19.8 stav (2) navedenog zakona izrečena novčana kazna i mjera zabrane angažovanja iz dispozitiva ožalbene odluke.

Odredbom člana 2.20. stav (1) Izbornog zakona BiH propisano je, između ostalog, da predsjednik upravlja radom biračkog odbora i zajedno sa članovima biračkog odbora, odgovoran je za zakonitost rada na biračkom mjestu, održava integritet procesa glasanja, odnosno brojanja i održava mir i red na biračkom mjestu i njegovoj okolini; popunjava sve potrebne obrasce.

Uvidom u spise predmeta ovo vijeće je zaključilo da je donosilac ožalbene odluke pravilno utvrdio da je žalitelj, kao predsjednik biračkog odbora odgovoran za nepravilnosti učinjene prilikom evidentiranja broja glasova u obrascu za zbirne rezultate (većinski glas) za Općinsko vijeće Bosanska Krupa, a što predstavlja povredu gore navedenih zakonskih odredbi.

Odgovornost žalitelja se zasniva na činjenici da je učestvovao u postupku brojanja glasačkih listića i popunjavanja obrazaca, kao i činjenici da je ispravnost navedenih podataka potvrdio svojeručnim potpisom na obrascima.

Odlučujući o navodima žalbe kojima se prigovara na visinu izrečene kazne, ovo vijeće je utvrdilo da je CIK BiH utvrdila sve pravno relevantne činjenice potrebne za utvrđivanja odgovornosti žalitelja i izreklo novčanu kaznu u iznosu od 400,00 KM, koja je srazmjerna učinjenom prekršaju. Odgovornost istog kao predsjednika biračkog odbora je veća u odnosu na članove biračkog odbora, jer on upravlja radom biračkog odbora, a zajedno s članovima biračkog odbora, odgovoran je za zakonitost rada na biračkom mjestu te za popunjavanje svih obrazaca pa je s toga prema shvatanju Apelacionog vijeća, pravilno i odmjerena kazna, koja je i viša u odnosu na ostale članove biračkog odbora, te je određena u granicama propisanim članom 19.8. stav (2) Izbornog zakona Bosne i Hercegovine

Centralna izborna komisija je pravilno postupila određivši žalitelju i mjeru zabrane angažovanja za rad na biračkom mjestu, odnosno u organima nadležnim za provođenje izbora na period od 4 (četiri) godine, računajući od dana pravosnažnosti osporavane odluke, nalazeći kao otežavajuću okolnost činjenicu da je imenovani odslušao cjelokupnu obuku za rad u biračkom odboru prema Planu i programu stalne edukacije predsjednika organa za provođenje izbora, a što prihvata i ovo vijeće.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 31/16) valjalo odbiti.

Zapisničar  
Snježana Topalović

**PREDSJEDNIK VIJEĆA**  
**S U D I J A**  
**Zvezdana Antonović**